

Kolaborasi Rentas Sempadan FPEP UMS dan STIE Tarakan, Indonesia

NST 2.6.2016 11

TARAKAN: Seramai lapan orang penyarah dari Fakulti Perniagaan, Ekonomi dan Perakaunan (FPEP), Universiti Malaysia Sabah (UMS) telah melakukan lawatan kerja ke Kota Tarakan bermula dari 30 Mei lalu yang dijangka akan berakhir hari ini (2 Jun).

Lawatan tersebut antara lain bertumpu kepada perbincangan lanjut mengenai penyelidikan bersama dengan para penyelidik dan penyarah dari Sekolah Tinggi Ilmu Ekonomi (STIE) Bulungan Tarakan, Indonesia.

Hasil perbincangan antara dua pihak, sejumlah lebih dari sepuluh projek penyelidikan dicadangkan oleh FPEP dan enam dari pihak STIE yang melibatkan bidang perniagaan, ekonomi, pelancongan dan pengurusan yang berhubung kait dengan negeri Sabah dan Kota Tarakan di Indonesia.

Menurut ketua STIE, Drs R. Philipus, kolaborasi bersama FPEP UMS ini merupakan kolaborasi penyelidikan yang julung kali diadakan oleh STIE bersama universiti dari luar negara.

Ujarnya, beliau percaya dengan kedudukan UMS sebagai antara universiti tersohor di Malaysia, maka beberapa dapatan-dapatan berimpak tinggi dapat dihasilkan hasil gabungan penyelidikan pensyarah UMS dan STIE.

"Ini sekali gus menjadikan kolaborasi semumpama ini akan merintis suatu budaya penyelidikan merentas sempadan yang mengharmonikan lagi persahabatan dua negara Malaysia dan Indonesia," katanya.

Sementara itu, penyarah FPEP, Prof Dr Arsiyah Hj Bahrom, selaku ketua rombongan UMS berkata banyak idea-idea baharu boleh ditonjolkan menerusi penyelidikan yang dilakukan bersama dalam konteks dua wilayah bersempadan dalam Kepulauan Borneo dan Kalimantan.

"Selain forum perbincangan, beberapa siri tinjauan, temu bual, dan kutipan data dibuat oleh para penyelidik dari UMS selama empat hari berada di Kota Tarakan.

"FPEP, UMS juga akan meterai Memorandum Persefahaman dalam masa terdekat dengan STIE bagi memperkukuh dan mempergiatkan lagi kerjasama dengan institusi pendidikan luar negara, yakni STIE," katanya.

Lawatan kali kedua FPEP, UMS ke STIE, Indonesia ini diharapkan dapat mempergiatkan lagi kerjasama dalam penyelidikan rentas sempadan, di samping aktiviti akademik lain yang berkaitan.

Para penyarah dari STIE juga dijangka akan berkunjung ke negeri Sabah sebagai melengkapkan hasil kajian antara dua pihak.